

欽  
定  
全  
唐  
文

欽定全唐文卷十三目錄

高宗三

授武士護等子孫官詔

勅建明堂詔

定明堂規制詔

簡擇史官詔

命皇太子領諸司啟事詔

營造孔子廟堂及學館詔

令州縣舉明習禮樂詔

禁僭服色立私社詔

改尚書省制勅用黃紙詔

更定選補桂廣交黔等州選士例詔

令山東江左採訪人物詔

幸東都詔

京官文武三品以上每年各舉所知詔

令雒州舉人詔

贈王遠知太中大夫詔

賜李延壽家物詔

減貢獻並蠲貸諸州詔

令雍州長史李義元禁僭侈詔

嚴考試明經進士詔

停封中岳詔

改元宏道大赦詔

赦妄言災異詔

除劉訥言名詔

遺詔

欽定全唐文卷十三

高宗三

授武士彠等子孫官詔

西漢元勲縹緖禮崇於末嗣東京列將茂賞覃於後昆繼絕  
興亡同歸一貫皇家受命蒼旻肇膺元籙恢張宇宙蕩一  
寰區御乾立極之圖諒資天啟撥亂經邦之略實賴人謀  
締想初基有足言者或委質唐郊首參一旅勤著荆棘勞  
宣草創或策名代邸先騁六飛誠備艱虞志踰金石咸以  
攀鱗上漢捧日登山氣叶風雲情均魚水其太原元從西

府舊僚今親詳覽具爲等級贈司徒并州都督忠孝公士  
護贈司空淮安郡王神通贈開府儀同三司并州都督夔  
國公劉宏基贈并州都督渝國公劉政會贈開府儀同三  
司并州都督莒國公唐儉贈左衛大將軍特進譙國公竇  
琮贈荊州都督邳國公長孫順德贈護國大將軍涼州都  
督竇國公史大柰贈幽州都督濮國公龐卿憚贈左武衛  
大將軍潭州都督巢國公錢九隴贈華州刺史霍國公柴  
紹贈潭州都督羅國公張平高贈相州刺史工部尚書河  
東郡公裴寂贈洪州都督樂安郡公李思行贈洪州都督

廬陵郡公秦行師贈代州都督真定郡公許緒贈涼州都督江夏郡公李高遷贈齊州刺史劉義節贈太尉申國公士廉贈司空蔣國公通贈太尉并州都督梁國公元齡贈司空蔡國公如晦贈司徒并州都督鄂國公敬德贈輔國大將軍揚州都督襲國公段志元贈驃騎大將軍益州都督宿國公程知節贈徐州刺史胡國公秦叔寶贈左衛大將軍涼州都督郢國公宇文士及贈左驍衛大將軍荊州都督郟國公張公謹贈荊州都督懷寧縣公杜公綽贈荊州都督東萊郡公公孫武達贈荊州都督遂安郡公李安

遠贈代州都督同安郡公鄭仁泰贈荊州都督漢東郡公  
李孟嘗贈幽州都督歷陽縣公獨孤彥雲故始州刺史襄  
武郡公劉師立等並立爲第一等功臣其家見在朝無五  
品已上官者子孫及曾孫擢一人授五品官若先有四品  
五品官者加授子孫第一人兩階若三品已上加爵三等  
其第二等功臣見在朝無五品已上官者子孫及曾孫擢  
一人授從六品已上官若先有五品已上官加一階六品  
官者加兩階三品已上官者加爵一等

勅建明堂詔



首出萬物實顯崇高之位曾覽八紘無違嚮明之道合宮  
聽朔闡皇軒之茂範靈符通神敷帝勛之景化殷人陽館  
青珪備禮姬氏元堂彤璋合獻雖運殊驪翰時變質文至  
於立大中建皇極軌物施教其歸一揆暨乎西京創厯駁  
政逾繁東漢開基舊章猶闕考圖汶上僅存公玉之儀度  
室圭躔纒紀中元之制三方鼎據祚傾於金馬五胡塵起  
道喪於蒼鵝自此相仍時經板蕩遂使陟配之典久淪於  
繇載端宸之化允屬於隆平朕恭膺寶命肅奉瑤圖昧且  
求衣仄景忘食賴上元垂祐宗社降靈幽明宅心中外禔

福封金岱嶺昭累聖之鴻勳勒石九都成文考之先志功  
標偃革時會委裘固可以作化明臺顯庸太室備機之歷  
既表於嘉名布政之宮式崇於美制是用求中測景取則  
陰陽考廣袤於裁圭定卑高於置塾傍羅八柱周建四墉  
架序儀天䟽基象地窗闔齊布應路並興導辟水以環階  
應旋衡而結極重阿複道用循測管之模上圓下方仍準  
分著之數木工不琢土事無文豐約折衷經始勿亟勾芒  
候序入春圃而司儀蓐收戒時下秋園而奉職事符神造  
鉤繩之用畢陳義叶子來覺落之期非遠將以肅禋清祀

展殷薦於皇靈施號法宮暢休聲於太帝百神執贄咸尊  
孝饗之風萬國來庭共覩太平之政闕文斯備大禮聿修  
制作之規可依別勅宜頒示天下永垂來葉

定明堂規制詔

合宮聽朔闡皇軒之茂範靈府通和敷帝勛之景化殷人  
陽館青珪備禮姬氏元堂彤璋合獻雖運殊驪翰時變質  
文至于立天中建皇極軌物施教其歸一揆考圖汶上僅  
存公玉之儀度室圭躔才紀中元之制屬炎精墜駕璿宮  
毀籥四海淪於沸鼎九土陷於塗原高祖大武皇帝仗鉞

唐郊收鈴雍野納祥符於蒼水受靈命於丕山飛沈泳沫  
動植游源太宗文皇帝盟津光誓協降火而登壇豐谷斷  
蛇應屯雲而鞠旅封金岱嶺昭累聖之鴻勳勒石九都成  
文考之先志固可以作化明堂顯庸太室傍羅八柱周建  
四門木工不琢土事無文豐約折衷經始勿亟闕文斯備  
大禮聿修其明堂院每面三百六十步當中置堂按周易  
乾之策二百一十有六坤之策一百四十有四總成三百  
六十故方三百六十步當中置堂處二儀之中定三才之  
本構茲一字臨此萬方自降院每面三門同爲一字徘徊

五間按尚書一暮有四時故四面各一所開門每時有三  
月故每一所開三門一暮十有二月故周迴總十二門所  
以面別一門應茲四序既一時而統三月故於一舍而置  
三門又周易三爲陽數二爲陰數合而爲五所以每門舍  
五間院四隅各置重樓其四墉各依本方色按淮南子地  
有四維故四樓又按月令水火金木土五方各異色故其  
墉各依本方之色基八面象八方按周禮黃琮禮地鄭元  
注琮者八方之玉以象地形故以祀地則知地形八方又  
按漢書武帝立八觚壇以祀地祭地之壇形象地故今爲

八方之基以象地形基高一丈二尺徑二百八十尺按漢書陽爲六律陰爲六呂陽與陰合故高一丈二尺又按周易三爲陽數八爲陰數三八相乘得二百四十丈按漢書九會之數有四十合爲二百八十所以基徑二百八十尺故以交通天地之和錯綜陰陽之數以明陽不獨運資陰和以助成陰不孤行待陽唱而方應陰陽兩順天地咸亨則百寶斯興九疇攸序基每面三階周迴十二階每階爲二十五級按漢書天有三階故每面三階地有十二辰故周迴十二階又按文子從凡至聖有二十五等故每階二

十五級所以應符星而設階法台耀以䟽陞上擬霄漢之儀下則地辰之數又列茲重級用準聖凡象皇極之高居俯庶類而臨耀基之上爲一堂其宇上圓按道德經天得一以清地得一以寧侯王得一以爲天下貞又曰道生一一生二二生三三生萬物又按漢書太極元氣函三爲一又曰天子以四海爲家故置一堂以象元氣并取四海爲家之義又按周禮蒼璧禮天鄭元注璧圓以象天故爲宇上圓堂每面九間各廣一丈九尺按尚書地有九州故立九間又按周易陰數十故間別一丈九尺所以規模厚地

準則陰陽法二氣以通基置九州於一宇堂周迴十二門  
每門高一丈七尺闊一丈三尺按禮記一歲有十二月所  
以置十二門又按周易陰數十陽數七故高一丈七尺又  
曰陽數五陰數八故闊一丈三尺所以調茲玉燭應彼金  
輝叶二氣以循環逐四序而迎節堂周迴二十四窗高一  
丈三尺闊一丈一尺二十三櫺二十四明按史記天有二  
十四氣故置二十四窗又按書一年十二月並象閏故高  
一丈三尺又按周易天數一地數十故闊一丈一尺又天  
數九地數十并四時成二十三故二十三櫺又按周易八



純卦之本體合二十四爻故有二十四明列牖疏象風候  
氣遠周天地之數曲準陰陽之和堂心八柱各長五十五  
尺按河圖八柱承天故置八柱又按周易大衍之數五十  
有五故長五十五尺聳茲八柱承彼九間數該大衍之規  
形符立極之制且柱爲陰數天實陽元柱以陰氣上昇天  
以陽和下降固陰陽之交泰乃天地之相承堂心之外置  
四柱爲四輔按漢書天有四輔星故置四柱以象四星內  
以八柱承天外象四輔明化上交下泰表裏相成叶台耀  
以分輝契編珠而拱極八柱四輔外第一重二十柱按周

易天數五地數十並五行之數合而爲二十故置二十柱  
體二儀而立數叶五位以裁規式符立極之功允應剛柔  
之道八柱四輔外第二重二十八柱按史記天有二十八  
宿故有二十八柱所以仰則乾圖上符景宿考編珠而紀  
度觀列宿以迎時八柱四輔外第三重三十二柱按漢書  
有八節八政八風八音四八三十二柱調風御節萬物資  
以化成布政流音九區仰而貽則外面周迴三十六柱按  
漢書一暮三十六旬故法之以置三十六柱所以象歲時  
而致用順寒暑以通微璿璣之度無愆玉曆之期永契八

柱之外修短總有三等按周易天地人爲三才故置柱長短三等所以擬三才以定位高下相形體萬物以資生長短兼運八柱之外都合一百二十柱按禮記天子置三公九卿二十七大夫八十一元士合爲一百二十是以置一百二十柱分職設官翊化資於多士開物成務構廈藉於羣材其上檻周迴二百四柱按周易坤之策一百四十有四又漢書九會之數有六十故置二百四柱所以採坤策之元妙法甲乙之精微環迴契辰象之規結構準陰陽之數又基以象地故叶策於坤元柱各依方復規模於甲子

重楣二百一十六條按周易乾之策二百一十有六故置二百一十六條所以規模易象擬法乾元應大衍之深元叶神策之至數大小節及拱總六千三百四十五按漢書會月之數六千三百四十五故置六千三百四十五枚所以遠採三統之文傍符會月之數契金儀而調節偶璇厯以和時重幹四百八十九枚按漢書章月二百三十五閏月周迴二百五十四總成四百八十九故置四百八十九枚所以法履端之奧義象舉正之芳猷規模厯象發明章閏下柳七十二枚按易緯有七十二候故置七十二枚所

以式模芳節取規貞候契至和於昌歷偶神數於休期上  
柳八十四枚按漢書九會之數有七十八又按莊子六合  
之外聖人存而不論司馬彪注天地四方爲六合總成八  
十四故置八十四枚所以模範二儀包羅六合準會陰陽  
之數周通氣候之源析六十枚按漢書推太歲之法有六  
十故置六十枚所以兼該歷數包括陰陽採甲乙之精微  
窮辰子之元奧連拱三百六十枚按周易當暮之日三百  
有六十故置三百六十枚所以叶周天之度準當暮之日  
順平分而成歲應晷運以循環小梁六十枚按漢書有六

十甲子故置六十枚構此虹梁遐規鳳歷傍竦四宇之製  
遙符六甲之源樺二百二十八枚按漢書章中二百二十  
八故置二百二十八枚所以應長歷之規象中月之度廣  
綜陰陽之數傍通寒暑之和方衡一十五重按尚書五行  
生數一十有五故置十五重結棟分間法五行而演祕疏  
楹疊構叶生數以成規南北大梁二根按周易太極生兩  
儀故置二大梁軌範乾坤模擬天地象元黃之合德表覆  
載以生成陽馬三十六道按易緯有三十六節故置三十  
六道所以顯茲嘉節契此貞辰分六氣以變陰陽環四象

而調風雨椽二千九百九十根按漢書月法二千三百九十二通法五百九十八共成二千九百九十所以偶推步之規合通法之數是知䟽椽構宇則大壯之架斯隆積月成年則會歷之規無爽大栢兩重重別三十六條總七十二按淮南子太平之時五日一風一年有七十二風故置七十二條所以通規瑞歷叶數祥風遙符淳俗之源遠則休徵之契飛檐椽九百二十九枚按漢書從子至午其數九百二十九所以採辰象之宏模法周天之至數且午爲陰本子實陽源子午分時則生成之道自著陰陽合德則

覆載之義茲隆堂檐徑二百八十八尺按周易乾之策二百一十六易緯云年有七十二候合爲二百八十八故徑二百八十八尺所以仰叶乾策遠承貞候順和氣而調序擬圓蓋以照臨堂上棟去基上面九十尺按周易天數九地數十以九乘十數當九十故去基上面九十尺所以上方圓清下儀方載契陰陽之至數叶交泰之貞符又以茲天九乘於地十象陽倡而陰和法乾施而坤成檐去地五十五尺按周易大衍之數五十有五故去地五十五尺所以擬大易之嘉數通惟神之至蹟道合萬象理貫三才上



以清陽玉葉覆之按淮南子清陽爲天合以清陽之色

簡擇史官詔

修撰國史義在典實自非操履貞白業量該通謹正有聞  
方堪此任所以承前繼居史官必就中簡擇灼然爲衆所  
推者方令著述如聞近日以來但居此職即知修撰非唯  
編緝踈舛亦恐漏泄史事自今以後宜遣史司於史官內  
簡擇堪任修史人錄名進內自餘雖居史職不得輒令聞  
見所修史籍及未行用國史等事

命皇太子領諸司啟事詔

東臺貳極之基道光於上嗣貞國之本事表於元良故能  
創北極之風敬東序之業功少海而逾潤孚前曜而增華  
皇太子宏寢門標美壽街騰懿三善夙茂瑜珮以之含鏘  
四學早優班翰以之凝映正以年在幼沖未從監撫雖調  
護方勤助琢磨之器而稼穡靡喻爽德教之途然爲教之  
方義資素習宜令皇太子宏每日於光順門內坐諸司有  
奏事小者並啟皇太子主者施行

營造孔子廟堂及學館詔

諸州縣孔子廟堂及學館有破壞并先來未造者遂使生

徒無肄業之所先師闕奠祭之儀久致飄露深非敬本宜  
令所司速事營造

令州縣舉明習禮樂詔

禮樂之道其來尚矣朕誕膺明命克光正厯思隆頌聲以  
康至道而曲臺闡訓猶乖揖讓之容大樂登歌徒紀鏗鏘  
之韻良以教虧縣蒞學闕瞽宗興言盛業寤歎盈抱然則  
幽誠所著縱九臯而必聞忠信所存在十室而無棄但慮  
習俎之彥韞跡於閭閻辨鐸之英韜深於林藪夫良玉無  
脛求之斯來真龍難覩好之而至其四方士庶及邱園棲

隱有能明習禮樂詳究音律於行無遺在藝可錄者宜令州縣搜揚博訪具以名聞

禁僭服色立私社詔

采章服飾本明貴賤升降有殊用崇勸獎如聞在外官人百姓有不依令式遂於袍衫之內著朱紫青綠等色短小襖子或於閭野公然露服貴賤莫辨有蠹彝倫自今已後衣服上下各依品秩上得通下下不得僭上仍令所司嚴加禁斷勿使更然又春秋二社本以祈農如聞除此之外別立當宗及邑義諸色等社遠集人眾別有聚斂遞相繩

糾浪有徵求雖於吉凶之家小有裨助在於百姓非無勞擾自今已後宜令官司嚴加禁斷

改尚書省制勅用黃紙詔

制勅施行既爲永式比用白紙多有蟲蠹自今以後尚書省頒下諸司諸州及下縣宜並用黃紙其承制勅之司量爲卷軸以備披簡

更定選補桂廣交黔等州選士例詔

桂廣交黔等州都督府比來所奏擬士人任官揀選未甚得所宜準舊例至應選補時差內外官五品以上清正官

充使選補仍令御史同往注擬其有應任五品以上官者  
奏取處分

令山東江左採訪人物詔

山東江左人物甚衆雖每充賓薦而未盡英髦或孝悌通  
神遐邇惟敬或德行光裕邦邑崇仰或學統九流垂帷觀  
奧或文高六藝下筆成章或備曉八音洞該七曜或射能  
穿札力可翹關或邱園秀異志存棲隱或將帥子孫素稱  
勇烈委巡撫大使咸加採訪佇申褒獎亦有婆娑鄉曲負  
材傲俗爲譏議所斥陷於踈弛之流者亦宜推擇各以名

聞

幸東都詔

咸京天府地隘人繁百役所歸五方胥萃雖獲登秋之積  
猶虧荐歲之資眷言于此思蠲徭賦夫以交風輿壤測景  
神州職貢所均水陸輻輳今茲豐熟特倍常時事貴從宜  
寔惟權道即以來年正月幸東都關內百姓宜免一年庸  
調及租并地子稅草其當道諸縣特免二年劔南隴右諸  
軍每供進一二年且停

京官文武三品以上每年各舉所知詔

京文武職事三品以上官每年各舉所知或才蘊廊廟器  
均瑚璉體王佐之嘉猷資公輔之宏量或奇謀異算決勝  
千里或投石拔距勇冠三軍或審諤忠亮志存規弼或繩  
違糾慝不避權豪或威惠仁明堪居牧守之重或公正廉  
直足膺令長之任咸宜搜訪具錄封進朕當詳覽量加獎  
擢

令雒州舉人詔

令雒州明揚仄陋或孝弟純至感於神明或文武兼資才  
堪將相或學藝該博業標儒首或藻思宏贍思擅文宗或



洞曉音律識均牙曠或深明歷數妙同京管者咸令薦舉  
贈王遠知太中大夫詔

門下故玉清觀道士王遠知性含幾蹟跡徇幽元體茲縣  
解見稱先覺自締構之初迄光華之旦綢繆恩遇事昭綸  
綽仙化不追英靈寢遠眷言留舄宜有褒崇可贈太中大  
夫諡曰昇真先生主者施行

賜李延壽家物詔

故符璽郎李延壽藝文該洽材兼良史撰政典一部詞殫  
直筆雖其人已亡功有可錄宜賜其家絹五十匹仍令詳

正所寫兩本付祕書一本賜皇太子

減貢獻並蠲貸諸州詔

朕聞受上天之命者其道在乎愛人處皇王之位者其功先於濟物然則所修在德池籟可以假貧人所寶惟賢珍玩不足奉諸已自朕臨御天下三十餘年永念黎元情深撫育頻頒制命猶未遵行所有差科尚多勞擾關中地狹衣食難周山東遭澇糧儲或少刺史縣令寄以字人長史司馬職惟毗贊若能恤隱求瘼清直無私則囹圄於是空虛鰥寡自然蘇息而在外官司罕能奉法志存苟且不舉

綱維欲使訟息刑清家給人足無爲而化其路何繇今當  
勵精求政先身理物救乏賙無自邇及遠凡在寮庶宜識  
至懷其殿中太僕寺馬並令減送羣牧諸方貢獻物及供  
進口味百司支料並宜量事減省雍岐華同四州六等已  
下戶宜免兩年地稅河北澇損戶常式蠲放之外特免一  
年調其有屋宇遭水破壞及糧食乏絕者令州縣勸課助  
修并加給貸

令雍州長史李義元禁僭侈詔

朕思還淳返樸示天下以質素如聞游手墮業此類極多

時稍不豐便致饑饉其異色綾錦並花間裙衣等靡費既廣俱害女工天后我之匹敵常著七破間裙豈不知更有靡麗服飾務遵節儉也其紫服赤衣閭閻公然服用兼商賈富人厚葬越禮卿可嚴加捉搦勿使更然

嚴考試明經進士詔

學者立身之本文者經國之資豈可假以虛名必須徵其實效如聞明經射策不讀正經抄撮義條纔有數卷進士不尋史傳惟誦舊策共相模擬本無實才所司考試之日曾不簡練因循舊例以分數爲限至於不辨章句未涉文

詞者以人數未充皆聽及第其中亦有明經學業該深者  
惟許通六進士文理華瞻者竟無科甲銓綜藝能遂無優  
劣試官又加顏面或容假手更相囑請莫憚糾繩繇是僥  
倖路開文儒漸廢興廉舉孝因此失人簡賢任能無方可  
致自今已後考功試人明經試帖取十帖得六已上者進  
士試雜文兩首識文律者然後並令試策仍嚴加捉搦必  
材藝灼然合升高第者並即依令其明法并書算貢舉人  
亦量準此例即爲常式

停封中岳詔

朕聞仁者德之本叶亭育之至途禮者道之末乃帝王之  
餘事厯選往初詳觀曩躅惻隱以乎其化變通以會其神  
朕以虛薄祗膺寶位盱食宵衣懼忝於宗社如傷若厲佇  
濟於黎元每以皇基肇闢範圍覆載遺惠所覃昭格區宇  
虔荷靈命嘗慮下虧鴻業遍刊羣嶽不足上報元功已升  
聞於日觀思款謁於天臺志在告成諒非爲己屬今茲豐  
稔方有事於嵩邱崇累聖之丕績祈兆人之嘉佑頃者分  
使出巡存問風俗河南河北尚有十餘州旱澇加以朔方  
寇盜時或侵邊關內流離未能復業一物失所猶甚納隍

數郡不寧豈宜備禮前欲以來年正月封中嶽者宜停

改元宏道大赦詔

朕以寡昧繆膺丕緒未嘗不孜孜訪道戰戰臨人馭朽懷  
秋駕之危負重積春冰之懼日慎一日三十四載於今矣  
何則足寒傷心人勞傷國下安即上逸時弊即君憂所以  
身處九重而情周萬姓建本之懷遽切抑末之念逾深今  
雖庶績已寧淳源未洽履素歸厚者遂寂寥而靡聞徇華  
趨利者尚馳騫而不息朕以薄德有謝移風永念羣方在  
予多愧況朕之繇系兆自元元固當遠協先規光宣道化

變率土於壽域濟蒼生於福林屬想華胥載勞寤寐所冀  
內外寮案各竭乃誠敦惟黎人俱崇簡質舊染薄俗咸與  
惟新憑大道而開元共普天而更始更申沛澤廣被紘埏  
可改永淳二年爲宏道元年大赦天下前後責情流人並  
放還老人年百歲以上者版授下州刺史婦人版授郡君  
九十已上者版授上州司馬婦人版授縣君八十已上者  
版授縣令并婦人并節級量賜粟帛孝子順孫義夫節婦  
表其門閭終身勿事鰥寡悼獨篤疾不能自存者量加賑  
恤仍令天下諸州置道士觀上州三所中州二所下州一



所每觀各度七人又比來天后事條深有益於爲政言近  
而意遠事小而功多務令崇用式遵無怠見任內外官五  
品以上經四考及守五品經三考六品以下計滿三考政

有清勤狀無私犯者各加一階

謹按道德真經廣訓卷二  
有改元宏道大赦詔文與

此異附注於後君崇於道宅紫微以垂衣臣修於德罄丹  
心而作礪若使上守於義下尊於禮名教所以乘淳忠信  
由其漸薄在昔胥庭連陸媯燧伏義不宰而天下化軒頊  
堯舜禹湯文武至公猶行深仁尚積及秦居閏位奢泰之  
漸聿興漢襲霸圖元默之風已替遐觀魏晉近鑒周隋代  
益囂浮人踰僭侈窮百王之弊俗極千年之否運以承大  
亂之後方開大聖之期既逾交喪之辰必興交泰之緒我  
高祖神堯皇帝受鑣宮之景命蕩轡野之妖氛重懸日月  
一匡宇宙太宗文皇帝披圖汶水杖鉞參墟降斗樞之神  
兵滌懷襄之巨浸張四維而安赤縣勞百戰而徇蒼生聲

教遐覃提封遠亘緬維洪業無得而稱朕以寡昧忝膺丕緒未嘗不孜孜訪道戰戰臨人日慎一日三十四載於今矣況下安則上逸時弊則君憂雖身處九重而情周萬姓建本之懷逾切抑末之念遽深今庶績雖凝而淳源未洽朕之繇系兆自元元常欲遠叶先規光宣道化變率土於壽域濟蒼生於福林屬想華胥載勞寤寐所冀內外寮案各竭迺誠敦勸黎萌俱崇簡質舊染薄俗咸與惟新憑大道而開元共普天而更始宜申霈澤廣被絃埏可大赦天下改永淳二年爲宏道元年仍令天下諸州置道士觀上州三所中州二所下州一所每觀度道士七人以彰清淨之風佇洽無爲之化主者施行

### 赦妄言災異詔

朕聞爲君上者以天下之目而視以天下之耳而聽蓋欲廣聞見也且夫天降災異所以警悟人君其變苟實言之

者何罪其事必虛聞之者足以自戒舜立謗木良有以也  
欲箝天下之口其可得乎此不足以加罪特令赦之

除劉訥言名詔

劉訥言收其餘藝參侍經史自府入官久淹歲月朝遊夕  
處竟無匡贊闕忠孝之良規進諛諧之鄙說儲宮敗德抑  
有所由情在好生不忍加戮宜從屏棄以勵將來可除名

遺詔

朕聞皇極者天下之至公神器者域中之大寶自非乾坤  
幽贊歷數在躬則鳳邸不易而臨龍圖難可輒御所以榮

河綠錯彰得一之符溫洛丹書著通三之表緬稽前古其道同歸朕之聖祖神宗降星虹而稟樞電乘時撫運逢渙沸而屬山鳴濡足橫流振蒼生之已溺援手四岳救赤縣之將焚重稱九寰止麟鬪而清日月再安八極息龍戰而蕩風波自彼迄今六十六載黎元無烽析之警區寓恣耕鑿之歡育子長孫擊壤鼓腹遐邇交泰誰之力歟朕以眇身嗣膺鴻緒欽若穹昊肅雍清廟顧諟明命載迪彝倫嘉與賢士大夫勵精爲政勗已想蛟冰之懼爲善慕雞鳴之懃幸戎夏乂安中外禔福亘月竈以覃正朔匝日城而混

車書端拱無虞垂衣有截其天意也豈人事乎每導俗匡  
時既宏之以禮讓恤刑薄罰復躋之於仁壽聞九農之或  
爽則虧膳以共其憂見一物之有違則撤樂以同其感斯  
亦備諸耳目非假一二言也憂勤之至庶有感於明靈亭  
育之懷謂無負於黔庶永言薄德遘疾彌留往屬先聖初  
崩遂以哀毀染疾久嬰風瘵疾與年侵近者以來忽焉大  
漸翌日之瘳難冀賜年之福罕邀但存亡者人之晦明生  
死者物之朝夕常情所滯唯聖能通脫屣萬方無足多恨  
皇太子哲握哀履已敦敏徇齊早著天人之範夙表皇帝

之器凡百王公卿佐各竭乃誠敬保元子克隆大業光我  
七百之基副茲億兆之願既終之後七日便殯天下至大  
宗社至重執契承祧不可暫曠皇太子可於柩前即皇帝  
位其服紀輕重宜依漢制以日易月於事爲宜園陵制度  
務從節儉軍國大事有不決者兼取天后進止諸王各加  
封一百戶公主加五十戶内外文武九品已上各加一階  
三品已下賜爵一級永徽以來入軍年五十者並放出軍  
天下百姓年五十者皆免課役廢萬全芳桂等官

欽定全唐文卷十四目錄

高宗 四

建明堂勅

獎顏揚庭進父師古匡謬正俗勅

停勅僧道犯罪同俗法推勘勅

檢閱新譯經論勅

賜薛仁貴手勅

命有司議沙門等致拜君親勅

與劉仁軌劉仁願勅

賜京城父老勅

禁帷帽勅

誅秦懷恪勅

褒皇太子上所注後漢書手勅

令舉猛士勅

父在爲母喪宜依古禮勅

冊代王宏爲皇太子文

冊張允恭鄴州都督文

冊許王孝秦州都督文



冊趙王福青州刺史文

冊唐臨吏部尚書文

冊鄧王元裕襄州刺史文

冊虢王鳳宋州刺史文

冊紀王慎澤州刺史文

冊段寶元越州都督文

冊喬師望涼州刺史文

冊閻立本工部尚書文

冊李寬太子詹事文

冊祀王上金鄜州刺史文

冊曹王明梁州都督文

冊郇王素節申州刺史文

冊潞王賢爲揚州都督仍徙封沛王文

冊贈渤海王文

冊劉伯英左監門衛大將軍文

冊許敬宗太子太師文

冊隴西郡王博又特進司宗卿文

冊曹王明號州刺史文

冊冀王輪文

冊紀王慎邢州刺史文

冊曹王明豫州刺史文

冊趙王福梁州都督文

冊諡孝敬皇帝文

冊周王顯左衛大將軍文

冊張延師鎮軍大將軍文

欽定全唐文卷十四

高宗四

建明堂勅

朕聞上元幽贊處崇高而不言皇王提象代神功而理物  
是知五精降德爰應帝者之尊九室垂文用紀配天之業  
且合宮靈符創宏規於上代太室總章標茂範於中葉雖  
質文殊制奢儉異時然其立天中作人極布政施教歸之  
一揆朕嗣膺下武丕承上烈思所以答眷上靈聿遵孝享  
而法宮曠禮明堂寢構今國家四表無虞人和歲稔作範

垂訓今也其時宜令所司與禮官學士等考覈故事詳議得失務依典禮造立明堂庶曠代闕文獲申於茲日因心展敬永垂於後昆其明堂制度令諸曹尚書及左右丞侍郎太常國子監祕書官宏文館學士同共詳議

獎顏揚庭進父師古匡謬正俗勅

顏師古業綜書林譽高詞苑討論經史多所匡正前件書發明故事諒爲博洽宜令所司錄一本付祕書閣仍賜其子符璽郎揚庭絹五十匹

停勅僧道犯罪同俗法推勘勅

道教清虛釋典微妙庶物藉其津梁三界之所遵仰比爲法末人澆多違制律且權依俗法以伸懲戒冀在止惡勸善非是以人輕法但出家人等俱有條制更別推科恐爲勞擾前令道士女道士僧尼有犯依俗法者宜停必有違犯宜依條制

檢閱新譯經論勅

大慈恩寺僧元奘所翻經論既新翻譯文義須精宜令太子太傅尚書左僕射燕國公于志寧中書令兼檢校吏部尚書南陽縣開國男來濟禮部尚書高陽縣開國男許敬

宗守黃門侍郎兼檢校太子左庶子汾陰縣開國男薛元超守中書侍郎兼檢校右庶子廣平縣開國男李義府中書侍郎杜正倫等時爲看閱有不穩便處即隨事潤色若須學士任量遣三兩人

賜薛仁貴手勅

金山大陣兇黨實繁卿身先士卒奮不顧命左衝右擊所向無前諸軍賈勇致斯尅捷宜善建功業全此令名也

命有司議沙門等致拜君親勅

勅旨君親之義在三之訓爲重愛敬之道凡百之行攸先

然釋老二門雖理絕常境恭孝之躅事叶儒津遂於尊極之地不行拜跪之禮因循日久迄乎茲辰宋朝暫革此風少選還遵舊貫朕稟天經以揚孝資地義而宣禮獎以名教被茲真俗而瀨鄉之基克成天構連河之化付以國王裁制之由諒歸斯矣今欲令道士女冠僧尼於君皇后及皇太子其父母所致拜或恐爽其恒情宜付有司詳議奏聞

與劉仁軌劉仁願勅

平壤軍迴一城不可獨固宜就拔新羅共其屯守若金法



敏藉卿等留鎮宜且停彼若其不須即宜泛海還也

賜京城父老勅

朕雖居九重之內常以萬姓爲心而誠不動天遂使陰陽  
錯謬自從去歲關中旱儉禾稼不收多有乏絕百姓不足  
責在朕躬每自思此深以爲媿今雒口倉廩且復充實更  
爲轉運於是艱辛理有便宜所以行也故召卿等爲宴別  
耳

禁帷帽勅

百官家口咸預士流至於衢路之間豈可全無障蔽婦人

比來多著帷帽遂棄鞵羅曾不乘車別坐檐子遞相倣效  
浸成風俗過爲輕率深失禮容前者已令漸改如聞猶未  
止息又命婦朝謁或將馳駕車旣入禁門有虧肅敬此並  
乖於儀式理須禁斷自今已後勿使更然

誅秦懷恪勅

王者統天理物莫不先安百姓百姓安者止在庶僚朕所  
以每精簡岳牧及諸州上佐自非至誠清白景行循良者  
不輒畀此職庶其各申智效以禪政道秦懷恪法司抵罪  
但合處流朕以刑政之典須越常憲豈不知哀敬折獄情

恤哀矜但以殺止惡義在懲肅又以刑人於市與衆棄之故對公等加其顯戮但法者國之權衡時之準繩也權衡所以定輕重準繩所以定曲直也罪惡難容者雖小必刑情狀可原者雖大必宥此乃彝典非故濫誅公等諸人當識朕意足爲殷鑒各宜勉之

褒皇太子上所注後漢書手勅

皇太子賢自頃監國留心政要撫字之風旣盡於哀矜刑網所施務存於審察加以聽覽餘暇專精墳典往聖遺編咸窺壺奧先王策府備討菁華好善載彰作貞斯在國家

之寄深副所懷可賜物五百段

令舉猛士勅

朕君臨宇宙司牧黎元普天之下罔不率服曩爾吐蕃僻居遐裔吐渾是其隣國遂乃奪其土宇往者暫遣偏裨欲復渾王故地義存拯救事匪稱兵輒肆昏迷潛相掩襲既無備預頗喪師徒因此鴟張每思狼顧除凶伐叛王者所急前歲將發六軍問其罪戾復以小寇無勞大舉按甲息兵庶其改過不思惠愛更起回邪敢縱狂惑專爲寇盜或改團鎮戍或驅抄羊馬烽燧頻舉煙塵不息候隙乘間倏

來忽往比止令鎮遏未能即事翦除莫懷寬大之恩遂長  
包藏之計禍盈惡稔當自覆滅今欲分命將帥窮其巢穴  
尅清荒服必寄英奇但秦雍之部俗稱勁勇汾晉之壤人  
擅驍雄宜令關內河東諸州廣求猛士在京者令中書門  
下於廟堂選試外州委使人與州縣相知揀練有膂力雄  
果弓馬灼然者咸宜甄採即以猛士爲名

父在爲母喪宜依古禮勅

惟周公制禮當歷代不刊況子夏爲傳乃孔門所受格條  
之內有父在爲母齊縗三年此有爲而爲非尊嚴之義與

其改作不如師古諸服紀宜一依喪服文

冊代王宏爲皇太子文

維永徽七年歲次景辰正月景寅朔六日辛未於戲夫明  
兩載象道貫三才元良表德業隆千古是以夏啟作貳光  
闡高猷姬誦外儲發揮王道詳求典冊式瞻七鬯固本垂  
統允歸正緒惟爾代王宏猗蘭毓祉喬桂凝華岐嶷表於  
天姿符瑞彰於神授器業英遠風鑒昭朗踐嘉義而總深  
仁捨幼志而標成德爰資玉裕早振金聲朕虔奉靈圖肅  
膺丕業仰惟七廟之重思隆萬葉之慶疇咨列辟欽若前

修是用命爾爲皇太子往欽哉爾其祇奉憲章率由軌度  
盡謙恭於齒胄審方俗於迎郊春禮冬詩趨庭匪懈三善  
六德勗志無愆絕驕奢之心納忠良之訓播徽猷於外宇  
申敬奉於中闈允睦周親務殷堯族永隆四術式寧萬類  
無怠無荒固保我宗基可不慎歟

冊張允恭鄴州都督文

維顯慶元年歲次景辰十二月辛卯朔八日戊戌皇帝若  
曰夫安邊訓俗有國之先猷簡賢任能爲政之常典惟爾  
蘭州都督安陸縣開國公張允恭器宇詳正識用邁遠夙

著勤誠早延恩遇今方違夙羌戎荐居降節監撫綏懷攸  
屬是用命爾爲使持節都督鄯蘭河儒廓淳等州諸軍事  
鄯州刺史封如故爾其鎮靜幽荒式清姦宄懔威稜以肅  
遠明賞罰以垂信乃無怠庶政率由舊章光膺寵命可不  
慎歟

冊許王孝秦州都督文

維顯慶元年歲次景辰十二月辛卯朔二十九日己未皇  
帝若曰於戲先王創業垂統分玉展親所以作固鴻業克  
隆景祚惟爾并州都督兼同州刺史上柱國許王孝性履



明裕神志清遠資孝敬以立身體溫恭以成性舊許是宅  
藩屏之寄以深全晉剖符維城之任愈切秦隴形要跨躡  
羌戎撫寧夷夏親賢攸屬是用命爾爲使持節都護秦成  
武渭四州諸軍事秦州都督勲官封如故爾其祗承典訓  
審慎刑獄懷遠以德招攜以禮無邇宵人無怠庶政對揚  
休命可不慎歟

冊趙王福青州刺史文

維顯慶二年歲次丁巳正月庚申朔二十一日庚辰皇帝  
若曰於戲夫姬周創制任隆方伯炎漢垂範寄重維城所

以任固邦基以藩王室惟爾右衛大將軍使持節鄜州諸  
軍事鄜州刺史趙王福識度夷雅器業沈秀建鳥旗以作  
牧錫虹珪以命祚蘭錡上將旣屬宗英海岱剖符允鍾懿  
感是用命爾爲使持節青州刺史其大將軍及封並如故  
爾其愛人理物慎獄恤刑率由王道以康庶績祇服寵命  
可不慎歟

冊唐臨吏部尚書文

維顯慶二年歲次丁巳十月丁亥朔十九日乙巳皇帝若  
曰昔虞舜分司元凱膺機揆之任當塗受命崔盧處銓綜

之重故能翊宣景化協贊時雍惟爾度支尚書唐臨器識  
沈敏操履貞潔譽滿周行效彰官次益損機務爰著循聲  
藻鑑流品是資清識是用命爾爲吏部尚書爾其懸衡處  
物虛心待士求賢審官循名責實祇承朝寵可不慎歟

冊鄧王元裕襄州刺史文

維顯慶三年歲次戊午正月甲申朔二十八日辛亥皇帝  
若曰於戲自九州命職百部分官闕懿德以宣風固親支  
而總務厯觀前載罔踰斯道壽州刺史上柱國鄧王元裕  
志業純深基宇崇隩標情文雅之地植操忠賢之軌壽春

作牧風教有成襄陽按部仁明允屬是用命爾爲使持節  
襄州諸軍事襄州刺史王及勲官如故往欽哉其勉思政  
本式康氓俗沔漢舊邦控帶爲重變其輕剽之黨旌其冠  
冕之望孤惇者咸恤正直者必親威惠並宣刑禮兼闡光  
膺典冊可不慎歟

冊號王鳳宋州刺史文

維顯慶三年歲次戊午正月甲申朔二十九日壬子皇帝  
若曰於戲永固鴻基義屬於藩衛載孚王化職隆於制舉  
厯選前修茲道無替豫州刺史上柱國號王鳳襟神秀發

理識淹遠夙標懿範早茂清徽寬恕以表其情恭遜以成其美荆河之地已洽於仁聲梁宋之郊佇聞於善政是用命王爲使持節宋州諸軍事宋州刺史王及勲官並如故往欽哉其克膺顯命式遵彝典崇孝義以訓下踐忠貞而奉上布廉平之化垂惠愛之風居敬而行簡恤隱而求瘼惟良丕寄可不慎歟

冊紀王慎澤州刺史文

維顯慶三年歲次戊午正月甲申朔三十日癸丑皇帝若曰於戲析壤分珪寄隆於宗子罷侯置守任切於惟良自

古明王率由茲典左衛大將軍徐州刺史上柱國紀王慎  
稟慶璇源分華紫極崇詩書而軌物敦教義而明道入典  
鉤陳恭肅表於清禁出膺刺舉寬簡洽於名藩高平形勝  
太行重阻地邇王畿親賢是屬是用命王爲使持節澤州  
諸軍事澤州刺史王及大將軍勲官如故朕聞之諸侯之  
孝在上不驕善人爲邦期月而可往欽哉其祗膺顯命率  
循典禮慎刑罰而教學校尊五美而屏四惡造次於仁夙  
夜無怠勉追風於往哲以垂裕於後昆可不慎歟

冊段寶元越州都督文

維顯慶三年歲次戊午七月辛巳朔十九日己亥皇帝若  
曰於戲夫成俗康邦寄深於岳牧宣風闡化任重於循良  
惟爾銀青光祿大夫行洛州長史段寶元體量凝整理懷  
貞瞻總務仙臺能官著於綱紀分司棘署令德表於平反  
三川之野允敷聲績九江之地爰資鎮撫是用命爾爲使  
持節都督越台括婺泉建六州諸軍事越州刺史爾其勤  
加恤隱勉思爲政審之以刑獄馭之以公平革剽悍之風  
歸淳質之軌欽茲寵命可不慎歟

冊喬師望涼州刺史文

維顯慶三年歲次戊午十月庚辰朔十一日庚寅皇帝若  
曰於戲夫恤隱求瘼義裕於循良撫衆懷邊允資於才幹  
惟爾正議大夫守涼州都督駙馬都尉喬師望風情敏濟  
志略明遠夙承榮寵早預驅馳仗節秋方功勤克展分符  
朔野政科伊肅玉門遠控金城遐阻人兼北狄地雜西戎  
刺舉爲難式過斯重是用命爾爲使持節八州諸軍事涼  
州刺史駙馬都尉如故往欽哉祇膺典冊勉修爾令德思  
效爾忠規垂清白之風布廣平之化絕姦宄於亭障徵訟  
獄於閭里嗣其和氣之美革彼貪頑之化光我王度可不



慎歟

冊閣立本工部尚書文

維顯慶四年歲次己未三月戊寅朔十七日甲午皇帝若  
曰職管納官任參機事上非德而不受下非才而不處咨  
爾將作大匠上護軍閣立本識局周敏理懷通悟體忠勤  
而表性資仁恕以立身而思協多能藝兼衆美委質運始  
策名朝列智効先於課職聲猷布於律紀爰緝水土之官  
實諧搢紳之論是用命爾爲兼工部尚書勲官如故往欽  
哉其敬承休命獻善之規攸屬持平之務斯在闕恭惟允

可不慎歟

冊李寬太子詹事文

維顯慶四年歲次己未三月戊寅朔二十五日壬寅皇帝  
若曰於戲弼諧儲副必俟才英總務宮端允資忠量故漢  
朝選德受禮峻於竇卿晉代光闕升崇歸於謝闕咨爾金  
紫光祿大夫懷州刺史上原縣開國侯李寬識局沈謹理  
懷詳正勤誠表於內外智効張於文武聲猷載闡齒秩兼  
優博望斷裁之規與能僉屬承華彈肅之寄任賢在斯是  
用命爾爲太子詹事封如故往欽哉其祗膺茂典勉修乃

職景前哲之高縱垂後昆之令譽對揚休寵可不慎歟

冊祀王上金鄜州刺史文

維顯慶四年歲次己未七月景子朔四日己卯皇帝若曰  
於戲昔堯分四岳漢總六條所以光闡帝猷式調萌俗者  
也爰自近古尤爲重任襟帶之地非親不居形勝之藩惟  
賢是處咨爾益州都督上柱國祀王上金岐嶷幼彰英徽  
早茂仁慈表性愛敬因心磐石之固攸歸分符之寄斯在  
是用命爾爲使持節鄜州諸軍事鄜州刺史餘如故夫道  
德齊禮爲政之良規踐義基忠立身之要道必恭謙而下

士無驕矜以傲法勉務農之闕勤恤隱之方往欽哉其祇  
朕命緝諧令績可不慎哉

冊曹王明梁州都督文

維顯慶四年歲次己未九月乙亥朔二十九日癸卯皇帝  
若曰於戲漢川紀關梁山表鎮南通庸蜀北達褒斜地實  
要衝人資剛銳式過之寄親賢攸屬惟爾上柱國曹王明  
志業沖遠襟神爽濟仁惠之風彌著慈和之美日聞析壤  
分珪旣隆於藩屏褰帷按部允期於政績是用命爾爲使  
持節都督梁洋壁集等四州諸軍事梁州刺史王及勲官

並如故往欽哉恤隱之任昔人尤重班條之職往哲稱難  
宜盡公平之心用崇寬恕之道聿遵前典勉修厥德惟良  
是屬可不慎歟

冊郇王素節申州刺史文

維顯慶四年歲次己未九月乙亥朔二十九日癸卯皇帝  
若曰於戲經邦之術寄宗子而維城御下之方資懿親而  
調俗緬尋遐載率修斯道咨爾上柱國郇王素節端凝幼  
彰清徽早茂夙聞詩禮之訓式光車服之寵邑連鍾武壤  
接平春合九州之遙塗控三門之險路形勝之地馬牧所

在是用命爾爲使持節申州諸軍事申州刺史王及勲官  
並如故往欽哉夫政化之要禮義爲先臣子之規忠孝爲  
本爾其慎修刺舉祇服炯戒仰鳴謙以自牧無侈縱而違  
道荷茲隆委可不慎歟

冊潞王賢爲揚州都督仍徙封沛王文

維龍朔元年歲次辛酉十月癸亥朔十七日己卯皇帝若  
曰於戲夫翦商統歷建侯以崇藩衛纂堯開運分土以光  
震聞故迺族茂麟趾經國之令圖地利犬牙裁化之明準  
惟爾雍州牧幽州都督上柱國潞王賢穎擢元樞軸榮紫

極姿儀映徹占對淹凝機悟韶敏風徽簡令雕鎔信義振  
英挺於觴年苑圃文詞標秀發於髫日藝優楚沛道駕天  
人繇蟻層臺舞鶴懸鏡湛清襟於篁沼鼓芳譽於蘋風是  
用命爾爲沛王使持節都督揚和滁潤常宣歙等七州諸  
軍事揚州刺史左武侯大將軍牧及勲並如故徐方奧壤  
泗水名區榮耀虞珪賞延漢礪加以作牧淮海式道京畿  
申大雅而釐風資樂善而揚德必宜靖恭廼位克懋聲猷  
光被寵重可不祇歟

冊贈渤海王文

維龍朔二年歲次壬戌五月十五日皇帝使大司成彭陽  
郡開國侯令狐德棻副使正議大夫行司宰少卿薛敏恭  
持節冊命曰咨夫存著嘉猷歿膺褒顯所以甄明景行昭  
紀勲烈況地居懿盛業茂惟貞用式暢情之禮實光追寵  
之義惟爾故金紫光祿大夫原州都督渤海郡王奉慈器  
範閑裕風裁淹遠德優時彥望重宗英析瑞名區早荷推  
恩之澤分符奧壤累藉宣條之任清白聞於朝宁威惠暴  
于毗謳固以功著旂常譽光圖史者矣而仁壽室爽貞徽  
淹謝永言親懿震悼良深是用贈王爲都督荆破岳朗四



州諸軍事荊州刺史右衛大將軍餘如故魂而不昧嘉茲  
榮寵嗚呼哀哉

冊劉伯英左監門衛大將軍文

閭闔任隆周廬禁切闕忠賢之允著實韜略之兼優惟爾  
冠軍大將軍左驍衛將軍山陽郡開國公劉伯英志力沈  
濟襟情爽烈早標奇正之術彌光巡警之功偃沙巨海闕

字功宣六豹氣壓三韓折衝之效有聞爪牙之任攸屬式

疇徽烈擢衛宸闈是用命爾爲左監門衛大將軍勲封如  
故往欽哉爾其職思無荒朕命不虞之寄可不慎歟

冊許敬宗太子太師文

於戲鳳紀龍名茂績光於鉛槧礪金鉤玉嘉庸絢於緹油  
蓋以協贊帝圖弼成鼎命矧乃望高咸一超庶尹而馳風  
道鬱半千冠羣后而宣譽咨爾光祿大夫行右相許敬宗  
藉敬生德基賢誕秀謀猷經制識度英遠培風逸幹業峻  
於巨臣滅景宏才器隆於王佐詞源清秘濯色於彫顰藝  
苑沖探抽華於繡牒揮汗簡於丹掖矯豐餌於雞栖翊宏  
詞於青闈影長纓於鶴籥訪溫樹之緘對譽宵燭而題明  
盛烈輝於西豪茂功表於東第寵翠泉之軒聖掩丹雲之

漢傑可以作訓元儲聳瑤山之瓌構喻水善貳疑激伊水  
之長瀾是用命爾爲太子太師監修國史等並如故加東  
臺三品仍知西臺事往欽哉爾其胙土而乘謙牧克己而  
蹈禮國晨謁金墀事切於忠蹇夜隨銀啟義光於調護靖  
共朝列可不慎歟

冊隴西郡王博又特進司宗卿文

維龍朔三年歲次癸亥十二月庚辰朔二十四日癸卯皇  
帝若曰於戲睦親之訓理鏡於遙圖章戚之規道光於絕  
簡若乃年耆德懋屬重望隆釋釐綜之勞遂優閒之禮惟

爾光祿大夫司禮太常伯隴西郡王博又發慶秩宗䟽翹  
靈派資忠竣業襲義揚風懷匪磷之貞心凌後凋之勁節  
榮兼中外效宣文武至乃影組文昌外贊清覽頻致由衷  
之請累申降階之謁雖鎮茲雅俗載佇於芳猷而爰靜澆  
馳重篤於撓尚是用命爾爲特進行司宗正卿封如故往  
欽哉秩亞青槐朝請之恩斯切禮華丹棘序錄之任攸歸  
恩邁前徽齊蹤往哲光膺寵命可不慎歟

冊曹王明虢州刺史文

維麟德元年歲次甲子正月己酉朔二十二日庚午皇帝

若曰於戲金楨璿萼分器先於茂親丹帷阜蓋按部盛於  
良牧藩條之寄載宣河潤之資斯遠固以聲芳偃桂德秀  
坐堂惟爾涼州都督上柱國曹王明幼範趨庭闕風識詔  
悟姿儀挺立豪春靈而馳賞絃秋竹而舒襟詞彩星稠對  
梁珠而混色情源冰徹帶趙璧而交輝韜兩獻而遐驥籠  
二武而孤峙是用命爾爲使持節虢州諸軍事虢州刺史  
勲封並如故往欽哉爾其履謙居節念損辭豐置醴以挹  
儒津錫戍以登文囿敬光喬梓貞返修筠率由舊章永保  
疆宇可不慎歟

冊冀王翰文

維總章二年歲次己巳十一月景午朔二十二日丁卯皇帝特使銀青光祿大夫守司戎太常伯上騎都府崔餘慶副使中御大監上柱國靈邱縣開國男万俟肅持節冊命曰於戲夫天垂景宿上躔帝子之宮地載兼山下列乾男之域是以聖人之登閔則大哲王之立道開階莫不奠磐石於周親樹良翰於宗懿故黃神命社降若水以䟽封蒼精建侯奄中都而錫壤用能克久寶祚式固鴻基茂緒藹乎龍圖盛業光於麟趾惟爾冀州大都督右金吾衛大將

軍上柱國冀王輪曾漢毓靈上枝摘景搖光甫薦允標墜  
燕之祥玉兔初聞遽叶占熊之兆中和在己仁義爲資洽  
藝通元驗賁駒之入關潛機應物見巨象之浮舟識茂髻  
辰神清綺歲趨庭承訓孝敬極於觀喬金殿傳經敏學踰  
於括羽擅三雍之雅對韞七步之閎才足以道架河書聲  
芬艷頌暨龍荒北鎮鷓水東臨侮食之渠稟稜威而革暴  
鳴弦之俗感惠化以遷訛製杼垂風含唐流詠若乃西河  
之地實曰奧區就日分郊關唐虞之舊國均霜闡野總虞  
夏之餘盟我圖爾居形勝斯在是用命爾爲冀王餘官勲

如故往欽哉爾其勞謙勉志樂善居心闕丹歎之徽章崇  
綠車之寵秩受茲中壤用保大藩允迪前修無或僭度維  
城之寄可不慎歟

冊紀王慎邢州刺史文

維總章二年歲次己巳闕月庚寅朔十二日辛丑皇帝若  
曰於戲昔封唐御極分嶽以鎮寰區宅鎬乘時建侯以隆  
藩衛用能發輝鼎祚翊贊昌圖制犬牙以廓地基茂麟趾  
而光天緒懿親啟翰其理則然惟爾使持節澤州諸軍事  
澤州刺史上柱國紀王慎稟慶星躔分華帝圃器表冲邈



軌鑒端凝業蘊珪璋藝包文武振英詞於五際陵桂嶽而  
含芳抗違議於三雍警蘋風而鼓譽仁孝爲立身之本貞  
恕存應物之方及䟽社上東建旗南服化流江漢道被歌  
謠中壘訓兵自穆銜珠之序長淮平俗式崇露冕之規冠  
雅政於羣邦標粹範於賢牧夷儀勝壤地乃邢遷跨全趙  
之郊畿總常山之襟要維城之寄僉曰爾諧是用命爾爲  
使持節邢州諸軍事邢州刺史上柱國王如故往欽哉爾  
其光闡六條敷崇四誠考閒平之令則酌魯衛之嘉猷無  
以傲從康無以縱敗禮迪於正典聿遵王度祗歷茂闕可

不勗歟

冊曹王明豫州刺史文

維總章二年歲次己巳三月己卯朔十三日辛卯皇帝若  
曰於戲夫鄴京統歷䟽青社以建侯炎漢握圖剖丹書而  
分國固以翦桐作屏實寄於周親剖竹開藩允屬於良牧  
睠言遐載諒迺通規惟爾使持節虢州諸軍事虢州刺史  
上柱國曹王明濯秀銀潢擣華璇極端潔成性自叶於遊  
蘭孝敬爲心有踰於訓梓馳精祕象驗封蟻之登辭披翰  
小山見騰塵之入頌業隆燕館道藹梁闌累播循風薦敷

簡政飛蝗感化不犯漢中之田猛獸懷仁遠避宏農之境  
若乃荆河奧壤井賦萬家周楚舊郊屬城千里形勝之地  
非親勿居是用命爾爲使持節豫州諸軍事豫州刺史上  
柱國王如故往欽哉爾其班條述職務盡於勤誠求瘼庇  
人事歸於平恕祇服炯誠勉修厥德維城之重可不慎歟

冊趙王福梁州都督文

維總章三年歲次庚午二月甲辰朔九日壬子皇帝若曰  
於戲夫姬祚斯永分玉瑞以建侯漢歷載融剖銅符而作  
鎮然則道光宗懿方膺錫社之榮跡著循良實允班條之

寄惟爾隰州刺史上柱國趙王福摛祥丹極毓慶元樞邁  
德爲資體仁成性趨庭演訓先承喻梓之恩樹屏凝規夙  
奉栽培之命樂善無倦率禮無愆聳蓋臨藩振英風於桂  
嶼褰帷按部流惠化於棠陰固以埒美鄴郇均聲河楚若  
乃華陽舊壤山抗西傾導漾名區地分南鄭騰言形勝諒  
在親賢是用命爾爲使持節都督梁璧洋集四州諸軍事  
梁州刺史上柱國王如故往欽哉爾其靖恭廼位聿遵前  
典勗貞恪之心務廉平之政茂對休寵可不慎歟

冊謚孝敬皇帝文

維上元二年八月五日天皇若曰於戲咨夫御圖錄者至  
聖荷提衡之業承宗廟者元良膺受命之期渺尋千古之  
外縱觀百王之表成功不處高讓之躅惟崇在賢斯授則  
哲之風逾遠睠彼勲華鼎祚傳於有德洎夫湯武寶歷歸  
於孟侯揖前載之宏謨成後王之茂範者也炎精失馭巨  
猾挺突普天陷塗炭之危區寓墜豺狼之毒我高祖神堯  
皇帝應天御物撥亂反正斬白蛇而定天下誓蒼兕而會  
諸侯底綏萬邦乂寧六合太宗文武聖皇帝循機統極出  
震開階鍊彩石而補乾綱拯橫流而恢地絡遠穆邇肅時

清頌平朕式纂昌基欽承睿緒幸憑累聖之福高居兆人之上靈符叶贊天命允集是以昭報先功鏤玉於外中之觀聿崇嚴配禋珪於布政之宮俗阜歲豐化淳刑措幽明以之郊社夷夏由其乂安馭朽逾兢寢繩多愧嘗以人之所寶者位雖處位以思沖心之所存者道希察道而求逸是以載想褰迎虛襟屣脫凝神不宰宣遊汾水之陽滌厲無爲訪道襄城之野咨爾故皇太子宏克岐克嶷有德有行事親以孝愛敬極於寢門奉上以忠恭慎形於馳道孝慈不犯惠以及人載隆三善之規無俟八繁之誡發揮弦

誦遜業之道彌光黼藻溫文承祧之望攸重撫軍監國大  
闡良圖百揆萬幾佇令居攝庶幾乾坤交泰主鬯之業方  
新日月重光繼照之明斯遠頃災象戒節屬爾沈疴實美  
惟痊釋予重負粵因瘳降告以斯懷爾忠懇特深孝情天  
至聞言哽咽感絕移時因此彌留奄然長逝伊川可望泣  
筌駕之無追瑤嶺難逢痛琴風之永絕循今念往震悼良  
深然事欲必行禮雖崇而闕二德闕可尚身已謝而宜尊  
加以尊名允符心許是用謚爾爲孝敬皇帝式昭典冊俾  
夫位光一德叶帝載於將來名參四大播天聲於無極明

靈若存享茲寶命嗚呼哀哉

冊周王顯左衛大將軍文

維儀鳳二年歲次丁丑二月甲午朔十二日乙巳天皇若  
曰於戲上圖圓極星躔分帝子之象下奠方輿列野宅天  
孫之鎮緬徽千古尚想百王法靈臺以啟封俾親賢而作  
輔是以軒邱御歷爰錫蒼林之祚幽室建侯載䟽曲阜之  
邑用能崇寶統贊昌期盛業茂於本枝鴻基峻於磐石惟  
爾洛州牧益州大都督兼太子左衛率使持節洮河道行  
軍元帥蔡州鎮撫上柱國周王顯高謀薦祉甫應瑤筐仙



域啟禎載分金榜迪中和之粹質蘊上德之良規風識俊  
邁機神爽徹純襟洽地義之方悌性睦天倫之重發揮沛  
易隱括河書多材之美載光樂善之風逾振洎乎遙臨西  
蜀控玉宇之全邦近牧東周闢銅衢之奧壤少城故地不  
變歌廉之俗太室餘萌載陶分陝之化總戎未舉威已聳  
於三羌作鎮方崇聲遠馳於萬里若乃左軍望重前馳任  
隆司鷁弁於宸階統熊渠於襟衛實惟心膂之要斯謂爪  
牙之職迺睠鷹揚寄於麟趾追蹤漢屏升驃騎之班繼美  
晉藩極領軍之選是用命爾爲左衛大將軍餘官勲封如

故惟天遵物厥命弗常惟人立躬在心則應性之所近邪  
正由乎積習事之所通感召同於影響祇畏之道賢哲同  
歸欽哉往敷乃訓率由前則竭愛敬之情砥溫恭之行在  
參期損据寵思危無耽樂是從非禮義勿踐永保朕命以  
蕃王室誕綏福祉可不慎歟

冊張延師鎮軍大將軍文

於戲姬歷初沖是資方郡之列漢圖攸永往隆南北之軍  
故鏤鼎垂勲銘常紀効坐樹之名爲重聞鞞之慮實深惟  
爾左衛大將軍檢校羽林軍上柱國張延師志局淹凝識

度閑雅當風雷之會遇經綸之日執羈霸府盡忠肅之勤  
誠聳劔元戎罄旌旄之茂績有六奇之祕術蘊三略之宏  
規邁遐列於孫吳掩芳聲於闕三報之迹紀運頻周光華  
之典賢才攸屬是用命爾爲鎮軍大將軍行左衛大將軍  
餘如故往欽哉其敬揚休命無忝朝獎勉爾幹慎之規宣  
明奇正之法連徽往彥可不慎歟